



INATSISARTUT

## Aningaasaqarnermut Naalackersuisoq

Ulloq: 10. december 2012

J.nr.: 01.31.06/12-00611

**Aningaasaqarnermut Akileraartarnernullu Ataatsimiititaliap sisamangornermi ulloq 6. december 2012-imi aalajangiineranik Naalackersuisunut ilisimatitsineq (suliaq nr. 01.31.06/12-00611)**

- **2012-2013-imi suliffissaaleqisunut immikkut ittumik suliniuteqarnissamut 2012-imi aningaasanik atorpeqanngitsunik 2013-imut nuussisinnaatitaanissamut ilassutitut aningaasaliissuteqarnissamik qinnuteqaat**

Naalackersuisut **inassutigaaat**,

- konto pingaarnermut 64.13.25-imut, Suliffissaaleqisunut immikkut ittumik suliniuteqarnermut tunngasumut, oqaasertaliussaq akuerineqassasoq

### **Aningaasaqarnermut Ataatsimiititaliap oqaaseqaatai**

- Oqaasertaliussaq una konto pingaarnermut 64.13.25-imut, suliffissaaleqisunut immikkut ittumik suliniuteqarnermut tunngasumut, ilanngunneqassasoq Naalackersuisut qinnutigaat:

*"Kontomi pingaarnermi matumani atuinikinnerussutinik 6 mio. koruunit tikillugit annertussuseqartunik ukiumut aningaasaliiffiusumut tullermut nuussisinnaanissamut Naalackersuisut piginnaatinneqassasut."*

Oqaasertaliussamut nassuiaat una konto pingaarnermut 64.13.25-imut ilanngunneqassasoq qinnutigineqarpoq:

*"Oqaasertaliussamik ilanngussinikkut aningaasat atorpeqanngitsoortut ukiumut aningaasaliiffiusumut tullermut nuussinnaanissaanni periarfissiinissaq qinnutigineqarpoq.*

*Suliffissaaleqisunut suliniuteqarneq naatsorsuutigisamit kingusinnerusumik aallartinneqarpoq, taamaattumik Naalackersuisut naatsorsuutigaat kontomi pingaarnermi matumani 6 mio. koruuninik annertussuseqartunik aningaasanik atunngitsuugaqartoqassasoq.*

*Piginnaatitsissummi matumani aningaasat aningaasaliissutigineqartut naleqqunnerpaamik atorpeqarsinnaanissaat Naalackersuisut kissaatigaat, taamaalilluni aningaasat suliniutinut aalajaatsumik suliffissaqartitsisinnaanissamik qulakkeerisussatut naatsorsuutigineqartunut atorpeqarnissaat kissaatigineqarluni.*

*Nuussisinnaanissaq qinnuteqaatigineqartooq taamaallaat ukiut  
aningaasaliiffiusut 2012-ip aamma 2013-ip akornanni atuutissaaq.*

*Oqaasertaliussaq nutaajuvoq.”*

Oqaasertaliussap danskisuuani naqinnerlugaqartooq ataatsimiititaliamit maluginiarneqarpoq, taamaalillunilu ima allaqqasoqarluni ”finasår”. Taanna ”finansår”-imut iluarseqquneqarpoq.

Illassutitut aningaasaliissutissatut qinnuteqaammik Aningaasaqarnermut Ataatsimiititaliap oqaatigineqartut malillugit akuersiniarnerata sivisunera konto pingaarnermi aningaasat atugassanngortinneqarnissaasa kinguarternerannut Naalackersuisut isummernissamut tunngavissiami tunngavilersuutigigaat ataatsimiititaliamit maluginiarneqarpoq (suliaq nr. 01.31.06/12-00577). Nassuiaat taanna ataatsimiititaliamit paasiuminaatsinneqarpoq, ataatsimiititaliamimmi ilisimaneqarpoq kommunit aningaasaleeqataassutissaat pillugit isumaqatigiissut aatsaat 2012-imi junimi aamma julimi naammassineqartooq.

Aningaasat tamakkiisumik atugassanngortinneqarsinnaanissaat ilimananngitsoq augustimili Naalackersuisunit eqqumaffigineqalerpoq, taamaattumillu aningaasat ukiuata naanissaa utaqinagu Naalackersuisut siusinnerusukkut iliuuseqarnissaat naapertuuttuusimassagaluarpoq. Konto pingaarneq una pillugu ingerlatsineq kusanarpallaanngitsutut ataatsimiititaliamit isumaqarfiginarpoq, tassami aningaasat ilassutitut aningaasaliissuteqarnikkut akuersissutigineqarput, maannalu aningaasat atorneqanngitsut 2013-imut nuunneqarnissaat qinnutigineqarluni.

Aningaasaqarnermut Ataatsimiititaliaq ima apeqqutissaqarlunilu oqaaseqaatissaqarpoq:

1. Konto pingaarnermut 64.13.25-imut, suliffissaaleqisunut immikkut ittumik suliniuteqarnermut tunngasumut, aningaasaliussat atugassanngortinneqarnissaat Naalackersuisunit sooq angumerineqarsimannginnersooq sukumiisumik nassuiaatigeqquneqarpoq. Aningaasaliissutinit tamarmiusunit 6 mio. kr.-it annertungaatsiarput, taamaattumillu suliffissaaleqisunut iliuusissat aallartinniarnerisa kinguaattoornerat missingersuutigineqartunut sanilliullugu atuinikinnerunermet pissutaasutut Naalackersuisunit tunngavilersuutigineqarnissaa naammassanngilaq.
2. Konto pingaarneq 64.13.25, suliffissaaleqisunut immikkut ittumik suliniuteqarnermut tunngasoq, 2013-imut allannguutissatut siunnersuut nr. 149 aqqutigalugu peerneqarmat ataatsimiititaliamit oqaatigineqassaaq. Tamanna qinnuteqaammut uunga atatillugu Naalackersuisunit ilanngullugu eqqarsaatigineqarsimassasoq Aningaasaqarnermut Ataatsimiititaliamit naatsorsuutigineqarpoq. Taamaattoqanngitsoq paasinarsissagaluarpat tamanna pillugu Naalackersuisut kinguarsaanertaqanngitsumik ataatsimiititaliamut ilisimatitsissuteqassapput.

### **Aningaasaqarnermut Ataatsimiititaliap aalajangiinera**

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliamit **akuerineqarput**.

Apeqqutinut oqaaseqaatinullu siuliani allassimasunut Naalakkersuisut akissutaat kalaallisut danskisullu kingusinnerpaamik ulloq 17. december 2012, nal. 12.00 nassiateqquneqarpoq assilineralu ukununnga nassiunneqarluni: [julie@ina.gl](mailto:julie@ina.gl) aamma [sakkak@ina.gl](mailto:sakkak@ina.gl).

### **Ataatsimiititaliaq sinnerlugu**

Andreas Uldum  
Ataatsimiititaliap siulittaasua